

Maman!



Projet promovût di 'Il Friuli' e 'ARLeF'

LIS AVENTURIS DI VIGJI E LUMI

NÛL
GRUM DI GOTUTIS
PICININIS O DI
CRISTAI DI GLACE
CHE AL PUES
DÂ PLOIE, NÛF,
TAMPIESTE

CJÂR DIARI,

di cualchi zornade incà a son finidis lis Fiestis: imagjini di sveâti une buinore tal clip di une stanzie cul spolert impiât e di sintî il profum di torte di miluçs e vanilie, che al somee che al dedi colôr ancje ai mûrs e che al rivi a cambiâ l'umôr des personis, des besteutis e dal timp. Par me il Nadâl al è stât come une torte di miluçs e vanilie.

Une buinore des mêis vacancis, o soi lade a cori pai cjamps de Basse. Intant che o corevi, o ai vût di fermâmi a colp: un **nûl** bocognon mi vignive daûr! Un nûl colôr de nêf. Un nûl fof. Un nûl che al nadave svelto tal cîl come che jo o corevi svelte intal polvar de strade di glerein. Bot e sclop, o sint alc che mi tire la code

e che mi dîs: "Zuie cun me!". Mi soi sfreolade subit i voi: une, dôs, trê voltis! Po dopo, o ai spiçadis ben lis orelis par sintî miôr: "Sù mo! Zuie cun me!".


O vin zuiât insiemi par miârs e miârs di minûts. Ae fin di dutis lis corsis, salts e tombulis che o vin fatis, il nûl mi à dite:

"Ti mostri alc che no tu âs mai viodût e che al à il to colôr".

Splif! Un flocut di nêf blanc e fof mi à colât tal nasut. Ce biel regâl che o ai vût!

Jo e il gno amî Nûl o vin decidût che vie pal an gnûf o fasarìn dispès il "Zûc dal Nadâl": o fasarìn tortis di miluçs e di vanilie, cun corsis, salts e tombulis.

Une bussade,
Lumi



LU SAVEVISO CHE...?

■ Zenâr al è il prin mêis dal an. Il so non al ven di Januarius, il mêis che te Rome Antighe al jere dedicât a Janus, che al jere il diu cun dôs musis: une e cjalave par daûr, bande l'an a pene finît, e une e cjalave par davanti, bande l'an a pene tacât. Al è il mêis plui frêt dal an tal nistri emisferi, ven a stâi chel Boreâl. Ma intal emisferi Austrâl cualchidun al è dal sigûr cui bregonuts curts!

Cemût mai? Parcè che intal emisferi Boreâl, Zenâr al corispunt al mêis di Lui dal emisferi Austrâl.



Maman! Une gnove stagjon cun tantis sorpresis!
Us din apontament su

Vinars aes
5.45 sot sere

telefriuli



> Tant par ridi


INDUVINE INDUVINEL:

A son doi zimui. Un al à non Zenarut e un al à non Avostin.

Zenarut al è nassût intal mêis di Zenâr.

Cuant isal nassût Avostin?

Tal mêis di Avost?!? No, nol è nassût in Avost! Al è nassût ancje lui in Zenâr, par vie che Zenarut e Avostin a son zimui.



IL CJANTON DE CJANÇON

IL MÛS DI ZENÂR

(Peraulis di Daria Miani;
musiche di Flaviano Miani)

*O vierç il barcon, o cjali tal cîl
a colin flocs blancs si poin tal curtîl.*

*Prime di fâ insiemi la nane
bevìn cjocolate cun tante pane.*

*Rit. Velu rivât il mêis di Zenâr
si impiin lis stuis e tancj fogolârs
di dodis mêis al è lui il prin
in ponte di pîts al rive cidin.*

Piçule cerce de cjançon "Il mêis di Zenâr" de pontade dai 12 di Zenâr dal 2018.

Lait a cirile sul sît de ARLeF:
www.arlef.it

LAVORUT

FLOC DI NÛF DI CJARTE

CE CHE US COVENTE

- un pâr di fuarpiis;
- un sfuei di cjarte blancje o di cartoncin;
- un lapis;
- une tace taronde.

CEMÛT FÂ IL FLOC DI NÛF DI CJARTE

- disegná cu la tace sul sfuei di cjarte blancje o sul cartoncin la forme dal cercli;
- taiâ cu lis fuarpiis il cercli;
- pleâ a metât il cercli;
- pleâ a metât il cercli une altre volte;
- pleâ pe tierce volte a metât il cercli par formâ un piçul triangul;
- taiâ cu lis fuarpiis, su ogni lâd dal triangul, tancj piçui trianguluts;
- vierzi il cercli di cjarte.

O vês fat un biel floc di nêf di picjà sui barcons. Brâfs!



Pagjine curade di Daria Miani
e dal Sportel Regionâl
pe Lenghe Furlane de ARLeF

ARLeF
AGENZIE
REGIONÂL
PE LENGHE
FURLANE